

四明叢書

張宗祥



尙書講義目錄

卷一 虞書

堯典

卷二 虞書

舜典

卷三 虞書

大禹謨

卷四 虞書

皋陶謨

益稷

卷五 夏書

禹貢

甘誓

卷六 夏書

五子之歌

胤征

卷七 商書

湯誓

仲虺之誥

湯誥

伊訓

卷八 商書

太甲上

太甲中

太甲下

卷九 商書

咸有一德

盤庚上

盤庚中

盤庚下

卷十 商書

說命上

說命中

說命下

高宗彤日

西伯戡黎

微子

卷十一 周書

泰誓上

泰誓中

泰誓下

牧誓

武成

卷十二 周書

洪範

卷十三 周書

旅獒

金縢

大誥

微子之命

卷十四 周書

康誥

酒誥

梓材

卷十五 周書

召誥

洛誥

卷十六 周書

多士 無逸

卷十七 周書

君奭 蔡仲之命 多方

卷十八 周書

立政 周官 君陳

卷十九 周書

顧命 康王之誥 畢命

君牙 冏命

卷二十 周書

呂刑

文侯之命

費誓

秦誓

尙書講義卷三

宋寧縣史 浩直翁撰

皋陶矢厥謨禹成厥功帝舜申之作大禹皋陶謨益稷
矢陳也謨嘉言也禹以功皋陶以謨列於帝堯之朝
舜因而申之宜矣而必附以益稷者史之意也蓋益
稷亦禹皋陶之儔也惟此四人舜之同僚而能推腹
心露誠實移所以事堯者事舜則舜必有以服其心
者矣得此四人心舜之所以有天下也文王作興
二老歸之說者謂天下之父歸之其子焉往漢高敘

三傑曰吾能用之所以得天下也然則帝舜申之而附以益稷意可見矣

大禹謨

曰若稽古大禹曰文命敷于四海祇承于帝曰后克艱厥后臣克艱厥臣政乃乂黎民敏德帝曰俞允若茲嘉言罔攸伏野無遺賢萬邦咸寧稽于眾舍己從人不虐無告不廢困窮惟帝時克

粵若稽古大禹曰文命文命禹之號若堯曰放勳舜曰重華是也放勳者蕩蕩乎民無能名巍巍乎其有

成功也重華者襲堯之爵行堯之道是堯而已矣文
命者奉堯之聲教而敷于四海也禹貢告功成而歸
美于帝曰東漸于海西被於流沙朔南暨聲教所謂
文命敷于四海祇承于帝也舜所以申禹之成功始
見于是其曰后克艱厥后臣克艱厥臣禹言爲君難
而爲臣不易也政乃作又黎民易於歸德者禹所以
戒舜也舜曰兪允若茲信其爲然也嘉言罔攸伏者
無言不聽也野無遺賢者無德不用也萬邦咸寧者
敏德之實也稽于眾舍己從人者無不好也不虐無

告不廢困窮者無一夫不被其澤也舜于此備言爲治之不自以爲德而歸德于堯故曰惟帝時克

益曰都帝德廣運乃聖乃神乃武乃文皇天眷命奄有四海爲天下君

都美也彼都者彼美也甚都者甚美也益聞禹贊敏德又聞舜之歸德乃推廣其意又有廣運之言焉以謂堯之治以道化也廣運如天之無爲四時行焉百物生焉天未嘗有爲也其所以敏德與夫惟帝時堯皆道之見於事業者故皆曰德也而堯德廣運冥然

不見其蹟者進乎道矣聖神文武隨所應而彰非可
以一德名也神耶聖耶文耶武耶不可得而指名矣
蕩蕩乎巍巍乎皇天眷命而使奄有四海者所謂大
哉堯之爲君也

禹曰惠迪吉從逆凶惟影響益曰吁戒哉儆戒無虞罔
失法度罔遊于逸罔淫于樂任賢勿貳去邪勿疑疑謀
勿成百志惟熙罔違道以干百姓之譽罔咈百姓以從
己之欲無怠無荒四夷來王

道降而有德非降也道之見於事業也是故謂之德

蓋道無對也孔子所謂巍巍乎顏子所謂卓爾孟子
所謂躍如也發而爲德則道生一矣生一則有兩端
是有對矣是故有吉必有凶吉凶由人所名顧所修
之德何如耳禹所謂惠迪吉從逆凶者思順其一而
無二三其德也所謂德惟一動罔不吉德二三動罔
不凶也天之降災祥在德而已矣舜於此蓋優爲之
益乃因禹之戒贊曰戒哉儆戒無虞聖人不畏多難
而畏無難也罔失法度無作聰明亂舊章也罔遊於
逸罔淫於樂無佚遊荒亡之事也任賢勿貳譖慝不

行也去邪勿疑無依違牽制也疑謀勿成無敢嘗試
爲之而僥倖其或成也百志安得不光明乎百姓之
譽人所欲得也違道而干毀必隨之矣何補乎百姓
之欲雖天必從拂其情而從吾之欲則背叛而不可
救矣何補乎此皆昏亂之世所有益事堯舜之君上
接洪荒斷無此事何自而知之耶蓋以理推也舜固
無是矣而益乃諄諄言之蓋舉其害德者以堅舜修
德之心愛君之道也舜不以爲忤無怠無荒勤而行
之四夷安得不歸往乎舜之德所以如天之無不覆

疇如地之無不持載至矣盡矣不可以有加者實得
禹益之規戒故進而不已而至於道也

禹曰於帝念哉德惟善政政在養民水火金木土穀惟
修正德利用厚生惟和九功惟敘九敘惟歌戒之用休
董之用威勸之以九歌俾勿壞帝曰俞地平天成六府
三事允治萬世永賴時乃功

舜重堯之華所以行堯之所未行皆盛德事也而益
尙戒之禹聞益之戒歎曰於欲帝念此言而無忽然
且指其治要以告之謂凡爲君必主於德以德爲政

斯爲善政善政之實專在養民民之所以有養以穀
爲重穀者養民之大本五材得是而能聚是故謂之
六府無則五材爲虛器雖有不能爲用也三德得是
而能宣是故謂之三事無是則三事爲虛名雖有不
能爲用也用五材三事者穀也陶冶械器則非粟不
易倉廩不實則禮節不知禹之胼胝荒度者意有在
於烝民乃粒而彝倫可敘也故箕子得洪範九疇之
要首言五行次言五事五行六府之本五事三事之
資也而繼之以八政一曰食蓋明九功非穀不能敘

也然則穀者實五材三事之精神脈絡也六府惟修
三事惟和非君有食以養斯民安得九功惟敘而斯
民歌舞以樂其生乎戒之用休洪範之五福也董之
用威洪範之六極也民知避凶而趨吉矣勸之以九
歌者以詠歌作起人心之嚮德也俾勿壞者仁聲入
人有日新之德而彝倫不斁也然則德惟善政果在
於不違農時務農重穀也後有人君今年下詔曰農
者天下之大本也明年下詔曰農者天下之大本也
卒使海內富庶興於禮義史臣贊其德曰務在養民